



BOSNIA AND HERZEGOVINA
FEDERATION OF BOSNIA AND HERZEGOVINA
JUDICIAL POLICE

Broj: 070-0-Su-Sp-25-000073
Sarajevo, 30.12.2025. godine

Na osnovu člana 10. tačka c), člana 66. Zakona o sudskoj policiji u Federaciji Bosne i Hercegovine („Službene novine Federacije BiH“, broj 77/20) i člana 77. Pravilnika o načinu vršenja poslova i primjeni ovlaštenja u Sudskoj policiji Federacije Bosne i Hercegovine („Službene novine Federacije BiH“, broj 25/21), a u vezi sa članom 57. Zakona o zaštiti ličnih podataka („Službeni glasnik BiH“, broj 12/2025) i Smjernica za upotrebu sistema videonadzora na zgradama pravosudnih institucija Bosne i Hercegovine, broj: 09-02-3-989-1/2020 od 10.03.2020. godine, donesenim od strane Visokog sudskog i tužilačkog vijeća Bosne i Hercegovine, v.d predsjednice Vrhovnog suda Federacije Bosne i Hercegovine, donosi

O D L U K U
O PRIMJENI VIDEO NADZORA NA OBJEKTIMA I PROSTORU KOJI OSIGURAVA
SUĐSKA POLICIJA U FEDERACIJI BOSNE I HERCEGOVINE

Član 1.
(Predmet odluke)

Ovom odlukom, utvrđuje se način primjene sistema video nadzora u Sudskoj policiji u Federaciji Bosne i Hercegovine (U daljem tekstu: Sudska policija) i definiše njegova svrha i opravdanost, te određuju pravila prikupljanja, obrade, načina korištenja i davanja prikupljenih podataka, način i rokovi čuvanja podataka u okviru primjene ovlaštenja audio i video snimanja na javnim mjestima utvrđenog Zakonom o sudskoj policiji u Federaciji Bosne i Hercegovine („Službene novine Federacije BiH“, broj 77/20) (U daljem tekstu: Zakon o sudskoj policiji).

Član 2.
(Vrsta podataka)

- (1) Audio i video snimanje predstavlja fotografisanje, praćenje zapisa u realnom vremenu, snimanje i pohranjivanje vizuelnih i tonskih zapisa.
- (2) Podaci koji se obrađuju sistemom video nadzora predstavljaju lične podatke u skladu sa Zakonom o zaštiti ličnih podataka („Službeni glasnik BiH“, br. 12/2025) (U daljem tekstu: Zakon o zaštiti ličnih podataka) i sadrže sliku, pokret, ton, vrijeme i datum video zapisa.
- (3) Pohranjeni podaci prikupljeni sistemom video nadzora predstavljaju zbirku ličnih podataka.

Član 3.
(Naziv i sjedište kontrolora ličnih podataka)

Kontrolor ličnih podataka je Sudska policija, odnosno osnovne i unutrašnje organizacione jedinice Sudske policije sa sjedištem u pravosudnim institucijama u Federaciji Bosne i Hercegovine (U daljem tekstu: Federacija BiH).

Član 4.

(Nosilac ličnih podataka)

- (1) Nosilac ličnih podataka, u smislu ove odluke je fizičko lice čiji je identitet utvrđen ili čiji se identitet može utvrditi, posredno ili neposredno, posebno pomoću identifikatora kao što su, identifikacioni broj, podaci o lokaciji, mrežni identifikator ili pomoću jednog ili više faktora svojstvenih za fizički, fiziološki, genetski, mentalni, ekonomski, kulturni ili društveni identitet tog lica.
- (2) Kategorije nosilaca podataka iz stava (1) ovog člana su: zaposleni u pravosudnim institucijama Federacije BiH, zaposleni u Sudskoj policiji, lica prema kojima i sa kojima postupa Sudska policija, stranke u sudskim postupcima, posjetitelji pravosudnih institucija u Federaciji BiH, te druga lica koja registruje sistem video nadzora neposredno u i oko pravosudnih institucija u Federaciji BiH ili objekata koje osigurava Sudska policija.

Član 5.

(Svrha obrade)

Video nadzor se provodi u svrhu:

- (1) Pružanja sigurnosti i zaštite, radi kontrole pristupa, što posebno podrazumjeva sigurnost i zaštitu imovine, osoba iz člana 4. stav (2) ove odluke, te sigurnosti i zaštite dokaznih materijala, dokumenata i sl.;
- (2) Sprječavanja, onemogućavanja i prema potrebi, istraživanja sigurnosnih incidenata, mogućih opasnosti ili neovlaštenih fizičkih ulazaka, uključujući neovlaštene pristupe osiguranim prostorima i prostorima pod zaštitom, informaciono tehničkoj infrastrukturi ili operativnim informacijama, te upravljanju njima;
- (3) Sprječavanja, otkrivanja i istraživanja slučajeva otuđenja opreme ili imovine u vlasništvu pravosudne institucije Federacije BiH ili Sudske policije, zaposlenika, ili posjetitelja, kao i sprečavanju, otkrivanju i istraživanju prijetnji sigurnosti u zgradama;
- (4) Odvratanja od činjenja navedenih i svih drugih inkriminiranih radnji u i oko prostorija pravosudnih institucija u Federaciji BiH i Sudske policije.

Član 6.

(Ograničavanje svrhe obrade)

- (1) Sistem video nadzora može se upotrebljavati samo u skladu sa svrhom, propisanom ovom odlukom.
- (2) Sistem video nadzora nije dozvoljeno koristiti radi kontrole zaposlenika, osim u slučajevima kada se radi o zaposlenicima koji su neposredno angažirani na poslovima vezanim za sigurnost, zaštitu ili kontrolu pristupa i kada je radno mjesto zaposlenika na javnom mjestu, odnosno mjestu koje je označeno kao mjesto ili prostor koji je pod video nadzorom.
- (3) Podaci prikupljeni sistemom video nadzora ne smiju se koristiti suprotno Zakonu o zaštiti ličnih podataka.

Član 7.

(Pristup i nadzor sistemu video nadzora)

- (1) Pristup i nadzor nad monitorima i uređajima za snimanje, bez obzira da li je sistem vlasništvo pravosudne institucije Federacije BiH ili Sudske policije, a u skladu sa principom „potrebno je znati“, uvijek treba biti kod nadležne organizacione jedinice Sudske policije.
- (2) Izuzetno od stava (1) ovog člana, nadzor nad monitorima i uređajima za snimanje, te mogućnost sigurnosno-preventivnog pregleda video zapisa može imati i pravosudna institucija, ali pod uslovom da u okvirima institucije egzistira poseban odjel za unutrašnje osiguranje i tehničku zaštitu koji je ustrojen na principu rada 24 sata dnevno i koji ima neposrednu i stalnu saradnju sa nadležnom organizacionom jedinicom Sudske policije.

- (3) Tačno određeni zaposlenici Sudske policije moraju posjedovati utvrđene šifre za pristup sistemu i eventualno potrebne sigurnosno-preventivne preglede u stvarnom vremenu i snimljenog materijala u proteklom periodu.
- (4) Ukoliko tehničke karakteristike i mogućnosti sistema video nadzora dozvoljavaju, šifre za pristup sistemu je potrebno razdvojiti za potrebe eventualno potrebnog sigurnosno-preventivnog pregleda u stvarnom vremenu od šifre za potrebe presnimavanja i izdavanje pohranjenog materijala.
- (5) Pristup sistemu video nadzora imaju zaposleni Sudske policije koje posebnim rješenjem ovlasti rukovodilac nadležne osnovne organizacione jedinice Sudske policije.
- (6) Pristup sistemu video nadzora imaju i ugovorni serviseri u obimu i mjeri neophodnoj za izvršavanje njihovih ugovornih obaveza.
- (7) Ugovoreni serviser iz stava (6) ovog člana je dužan Sudskoj policiji prezentovati generalijske podatke o licima koja u ime servisera izvršavaju ugovorene obaveze.

Član 8.

(Odobranje izdavanja snimljenog materijala)

- (1) Pristupanje pohranjenom materijalu za potrebe presnimavanja i izdavanja vrši se na obrazložen pismeni zahtjev tražioca podataka.
- (2) Pristupanje pohranjenom materijalu za potrebe presnimavanja i izdavanja vrši se onda kada, na temelju podnesenog zahtjeva i objektivnih okolnosti i utvrđenih poslova i ovlaštenja u Zakonu o sudskoj policiji, lice ovlašteno za pristupanje, procijeni da je to potrebno radi ostvarivanja svrhe iz člana 5. ove odluke.
- (3) Nositelj podataka, na obrazložen pismeni zahtjev, u opravdanim slučajevima, može ostvariti pravo na uvid ili dobiti kopiju snimka, koji sadrži podatke koji se odnose na njega, a u skladu sa Zakonom o slobodi pristupa informacijama u Federaciji BiH.
- (4) Presnimavanje i izdavanje snimljenog materijala se na zahtjev rukovodioca osnovne organizacione jedinice odobrava donošenjem posebne odluke od strane direktora Sudske policije.
- (5) Primjerak kopije izdatog snimljenog materijala se zadržava u spisu predmeta.

Član 9.

(Povjerljivost)

- (1) Ovlašteni zaposleni Sudske policije sa pravom pristupa, uključujući lica određena od ugovornih servisera koji provode redovne aktivnosti na informaciono tehničkom sistemu se pozivaju na povjerljivost i obavezuju da neće neovlašteno i nezakonito ustupati, pokazivati ili na bilo koji drugi način iznositi sadržaj bilo kojeg video zapisa.
- (2) Prikupljeni podaci predstavljaju povjerljive i zakonom zaštićene podatke.
- (3) Obaveza čuvanja povjerljivosti podataka ostaje na snazi i nakon prestanka radnog odnosa, odnosno izvršenja određenog zadatka.

Član 10.

(Mjere zaštite podataka)

- (1) Sva zaposlena lica će vršiti profesionalno i stručno rukovanje i nadzor nad radom sistema video nadzora i postupati sa svim informacijama pribavljenim u toku rada, na način da se održi najviši nivo integriteta, povjerljivosti i tačnosti istih, te briga o dostojanstvu i privatnosti svih osoba koje ulaze i borave u prostorijama pravosudnih institucija u Federaciji BiH i Sudske policije.
- (2) Zaposlena lica dužna su poduzeti mjere protiv neovlaštenog ili slučajnog pristupa prikupljenim podacima, njihovog mijenjanja, uništavanja ili gubitka, neovlaštenog prijenosa, drugih oblika nezakonite obrade i protiv zloupotrebe ličnih podataka.
- (3) U cilju neprekidnog funkcionisanja sistema video nadzora, Sudska policija će vršiti redovan pregled i po potrebi, osigurati servisiranje i zamjenu dotrajalih dijelova sistema u skladu sa ugovorom potpisanim sa ugovorenim dobavljačem.

Član 11.

(Period čuvanja podataka)

Prikupljeni podaci se čuvaju onoliko dugo koliko dozvoljavaju tehničke mogućnosti instaliranog sistema ili koliko je potrebno da se ispuni svrha i cilj utvrđeni ovom odlukom.

Član 12.

(Rad kamera i uređaja za snimanje)

- (1) Sistem video nadzora je informaciono-komunikacioni sistem koji ima mogućnost prikupljanja i daljnje obrade ličnih podataka, koji obuhvata stvaranje snimka koji čini ili je namijenjen da čini dio sistema skladištenja.
- (2) Vanjske kamere koje se ugrađuju u sistem video nadzora trebaju imati mogućnost prenosa video zapisa dan/noć sa adekvatnom zaštitom od vanjskih uticaja.
- (3) Uređaj za snimanje treba biti smješten na odgovarajući način kako bi se osiguralo pravilno funkcionisanje i zaštita od uništenja ili otuđenja (smještaj u posebne ormariće sa zaključavanjem ili druge prostore koji su pod nadzorom i kontrolom ulaska i pristupa) i imati mogućnost prijenosa podataka na medij i u formatu koji je čitljiv na računaru, dok videozapisi trebaju imati konstantni kvalitet zapisa.
- (4) Izuzetno, u slučajevima da se snimke s uređaja za snimanje iz stava (3) ovog člana pohranjuju na memorijske kartice, tvrde diskove ili na druge medije koji se nalaze u kameri, ti mediji moraju biti smješteni na posebna mjesta gdje ne mogu biti dostupni neovlaštenim osobama.
- (5) Uređaji za snimanje video zapisa moraju imati mogućnost automatskog nastavka snimanja video zapisa odmah nakon prestanka napajanja uređaja, programiranja zaštitnih šifri i utvrđivanja prava korištenja za pojedine korisnike radi kontrole korištenja uređaja za snimanje.
- (6) Video nadzor mora imati mogućnost prijenosa slike (video zapisa) kablovskim ili putem internet mreže (LAN i sl.), na dojavni centar ili na poseban uređaj (monitor i snimač) u objektu koji se čuva.

Član 13.

(Lokacija kamera)

- (1) Kamere koje se ugrađuju u sistem video nadzora trebaju imati adekvatnu rezoluciju, a prilikom ugradnje video nadzora tj. kamera na mjesta koja su predviđena projektom tehničke zaštite, u vidnom polju kamere ne smiju se nalaziti bilo kakve prepreke zbog čijeg prisustva se onemogućava pravilno funkcionisanje video nadzornog sistema.
- (2) Nadzorne video kamere na objektima koje osigurava Sudska policija, kao i na zgradama pravosudnih institucija u pravilu se postavljaju na prostoru koji pokriva vanjski dio objekta, parking prostor, glavnom ulazu, izlazu, izlazima sa slučaj nužde, požarnom putu, stubištima, hodnicima u kojima se kreću stranke, sudnicama za javno suđenje, prostorijama za čuvanje dokaza, prostorijama za primopredaju i zadržavanje lica lišenih slobode i drugim prostorijama ukoliko se isto procjeni potrebnim iz sigurnosnih razloga.

Član 14.

(Obavještenje o vršenju video nadzora)

- (1) Vlasnik video nadzora dužan je postaviti obavještenje o video nadzoru na način da se na objektu postave vidna obilježja kojima se javnost obavještava o činjenici da je konkretan objekat ili prostor pod video nadzorom pod kontrolom Sudske policije.
- (2) Obavještenje iz stava (1) ovog člana, treba biti izrađeno od odgovarajućeg čvrstog materijala (plastika, pleksiglas, lim ili sl.) i ne smije biti manje od veličine 20x20 cm na kome je likovni, odnosno grafički simbol video nadzora i jasno vidljiv natpis: "OBJEKAT JE POD VIDEO NADZOROM" sa navedenim brojem telefona vlasnika video nadzora.

- (3) Obavještenje sadrži informaciju, s ciljem upoznavanja osoba koje borave ili posjećuju prostor ili prostorije koje osigurava Sudska policija ili koristi pravosudna institucija u Federaciji BiH, da mogu biti snimljene sigurnosnim nadzornim kamerama.
- (4) Dodatne informacije o video nadzoru nosilac podataka može dobiti putem nadležnih rukovodnih službenika Sudske policije.

Član 15.

(Pojedinačne odluke o instaliranom video nadzoru)

- (1) U skladu sa odredbama Zakona o sudskoj policiji i ovom odlukom, rukovodilac nadležne osnovne organizacione jedinice Sudske policije će donijeti pojedinačnu odluku o instaliranom sistemu video nadzora za svaki pojedinačni objekat na kojem je u skladu sa nadležnostima instaliran sistem video nadzora koji je vlasništvo Sudske policije.
- (2) Prijedlog odluke iz stava (1) ovog člana, sačinjava rukovodilac osnovne organizacione jedinice Sudske policije i istu putem Jedinice za sigurnost i zaštitu Sudske policije, dostavlja direktoru na odobravanje.
- (3) Odluka iz stava (1) ovog člana, ovisno o konkretnom objektu i specifičnostima istoga obavezno sadrži sve pojedinačne elemente iz čl. 5. do 14. ove odluke.

Član 16.

(Zajednički sistemi video nadzora)

- (1) U slučajevima kada se radi o sistemu video nadzora čije vlasništvo je kombinacija pravosudne institucije Federacije BiH i Sudske policije, pitanje nadležnosti za donošenje odluke iz člana 15. ove odluke, će usaglasiti direktor Sudske policije ili rukovodilac mjesno nadležne osnovne organizacione jedinice Sudske policije neposredno sa rukovodiocem pravosudne institucije koja se osigurava, odnosno na kojoj je instaliran sistem video nadzora.
- (2) Donosilac odluke iz stava (1) ovog člana preuzima i obaveze da konstantno vodi brigu o tehničkim i organizacijskim mjerama koje za cilj imaju zaštitu sigurnosti cijelog sistema video nadzora, uključujući i lične podatke koji se prikupljaju i obrađuju.

Član 17.

(Evidencija o ustupanju pohranjenog materijala)

- (1) Nadležna osnovna organizaciona jedinica Sudske policije za svaki instalirani video nadzor vodi evidenciju o izdatom snimljenom materijalu na osnovu datog odobrenja o ustupanju, kao i o zahtjevima u kojima je odlukom odbijeno izdavanje i ustupanje pohranjenog materijala.
- (2) Evidencija iz stava (1) ove odluke sadrži:
 - a) Naziv podnosioca zahtjeva za izdavanje;
 - b) Svrha i cilj pristupa pohranjenom materijalu;
 - c) Mjesto, objekat, lokaciju kamere i vrijeme snimanja podataka;
 - b) Broj odluke o odobravanju pristupa ili odbijanju pristupa.
- (3) Evidencije iz stava (1) ove odluke se čuvaju najmanje 12 mjeseci.

Član 18.

(Prilog elaboratu zaštite objekta i imovine)

Pojedinačne odluke iz člana 15. ove odluke, čine prilog Elaborata zaštite objekta i imovine.

Član 19.

(Prelazne odredbe)

- (1) Pojedinačne odluke iz člana 15. ove odluke, potrebno je donijeti u roku od 90 dana od stupanja na snagu ove odluke.
- (2) Do donošenja pojedinačnih odluka iz stava (1) ove odluke, ostaju na snazi ranije donesene pojedinačne odluke.

Član 20.
(Prestanak važenja)

Danom stupanja na snagu ove odluke prestaje da važi Odluka o video nadzoru, broj: SU-Sp-90/21 od 03.12.2021. godine.

Član 21.
(Stupanje na snagu)

Ova odluka stupa na snagu narednog dana od dana donošenja i ista će se biti objavljena na službenoj web stranici Sudske policije i putem direktora Sudske policije dostavljena svim osnovnim organizacionim jedinicama Sudske policije.

Dostaviti:

- direktor Sudske policije u Federaciji Bosne i Hercegovine – 2x;
- a/a.



v.d. PREDsjedNICE
VRHOVNOG SUDA FEDERACIJE BIH

Božidarka Dugonjić
mr. Božidarka Dugonjić